

पराग-गज़ल माला इक जायजा

□ डॉ० सत्यपाल शास्त्री श्रीवत्स

एकलाचल ते दिल्ली जनेह बहुभाशा भाशी नेके संस्कृतिये दे संगम आह्लै शैहरै च रौहदा होआ बी गुम्नामी दे न्हरे च लगातार साधना-रत होंदा होआ अपनी मातृभूमी डुग्गर ते मां-बोल्ली डोगरी दी धड़कन गी अपनी संवेदनात्मक भावभूमी च रचाई-पचाइयै म्हेशां मसूसदा होआ ते कन्नै-कन्नै उर्दू ते हिन्दी जनेहिये समृद्ध भाशें दे प्रति बी अपनी देनदारी नभांदा होआ इक योगी आह्ला लेखा अपने लेखन कार्य च मस्त रौहने आह्ला कवि ते साहित्यकार ऐ श्याम दत्त पराग जिन्न हून तक उर्दू, हिन्दी ते डोगरी दियां 58 रचनां रचियै कवि ते साहित्यकार दे नाते इक इतिहासक कम्म कीता ऐ। इ'नें 58 रचनें च हिन्दी ते डोगरी दियां गै मतियां काव्य रचनां न। पराग गज़ल माला संग्रैह 58 रचनें च शामिल ऐ। इंदे इलावा बी पराग होरें अस्सी दे लगभग हिन्दी ते बीह डोगरी बाल साहित्य सरबन्धी रचनां प्रकाशत करियै बाल साहित्य रचनाकार दे रूप च सिरमौर थाहर बनाई लैने दे बाद हून साहित्य अकादमी दिल्ली दिये नज़रें च आइयै 16 नंबर 2011 गी कलकत्ते च सम्मानत होए।

बेशक कवि पराग ने डोगरी कविता विधा दे खेतर च नेकां अयाम छूहते न, पर गज़ल विधा अकसर हून तोड़ी इ'दी कलमां कोला अछूहती गै र'वा करदी ही। शायद इस बारे च पराग होर अपने अंदर हीनभावना बी अनुभव करदे होडन, पर इस संग्रैह गी प्रकाशत करियै इ'नेंगी यकीनन गै मानसक सकून हासल होआ करदा होना।

इसलै इ'नें पंक्तिये दा लेखक इत्थें सिर्फ इसदे बारे च संक्षिप्त गल्ल गै करने आह्ला ऐ। इसदे कला पक्ख ते भाव पक्ख दे बारे च ब्योरे बार मूल्यांकन करना, इस लेख दी सीमा कोला बाहर ऐ। फही बी संक्षेप कन्नै जेहड़ी गल्ल कीती जा करदी ऐ, उसदे दायरे च सारे पक्ख छूहने दा जतन कीता गेदा ऐ।

अगैं बधने थमां पैहलें अस पराग होरें गी इस गल्ला लेई मुबारक दिन्ने आं जे एह अपनी इस चरासिमें ब'रें दी उमरी च बी अपनी नोखी स्मरण शक्ति दी कृपा कन्नै अपने कविता रचने दे कम्मै च बदस्तूर व्यस्त रौहदे न।

सन् 1965 च जिसलै एह अकाशवाणी जम्मू थमां तब्दील होइयै दिल्ली केन्द्र च जाई

पुञ्जे हे, तां उसलै इंदी उमर मैहज 38 बरै ही। कैसा म्हूर्त हा, ओह जि'नै इ'नें गी भाए म्हेशां लेई शरीरी तौर पर दिल्ली बासी ते बनाई दिता, पर मानसक तौर पर एह अपनी मातृभूमि ते मां बोल्ली कन्नै संवेदनात्मक रूप कन्नै लगातार जुड़े दे न ते इंदी भावभूमि थमां डोगरी कवता बदस्तूर उभरदी रौह्दी ऐ। नेई तां संवेदनाहीन ते भुलकड़ आदमी संताली बरै दी उमरी च किन्ना किश भुल्ली जंदा ऐ।

अपनी इस लम्मी उमर दे दुरान इ'नें नेकें परिस्थितियें कन्नै दो-चार होंदे होए जेहड़े कौड़े-मिट्ठे अनुभव हासल कीते उंदी अकासी ते इंदे इस संग्रैह च शामिल केइयें गजलें च होई दी गै ऐ, पर अगली अवस्था च माहनू गी जेहड़े मौती दी आमद दे बारे च ते उस असीम सत्ता दे बारे च जिज्ञासा होने करी कदै-कदै जेहड़े अध्यात्मक ते दार्शनिक भावें दे एहसास होंदे न, अपनियें गजले दे केइयें शेऽरें च पराग होरें उंदी बी काव्यात्मक तस्वीर पेश कीती दी ऐ। इन्ना गै नेई केइयें गजली शेऽरें च कवि ने छायावादी भावें दी तस्वीर उकेरने च बी कामयाबी हासल कीती दी ऐ। मुखसर तौर पर अस आक्खी सकने आं जे कवि पराग ने अपने युगबोध कोला प्रेरत होइयै अपने परिवेश च जे किश दिक्खेआ, परखेआ ते अनुभव कीता उसदी अभिव्यक्ति ते इ'नें शेऽरें च है गै, पर अपनी लम्मी उमरी दे तकजे ने इ'नेंगी इस जीवन यात्रा दे बाद बी झांकने-परखने दी जेहड़ी इक तांहग दिती कवि पराग कुतै-कुतै उसदी झलक बी बखूबी पेश करदा ऐ।

कवि पराग ने केइयें गजलें दे शेऽर बड्डियें ते केइयें दे निक्कियें बैहरें च रचे दे न जद के केई दरम्यानी बैहरें च बी रचे दे न।

जित्थें तक इस संग्रैह दे गजली शेऽरें दे कला पक्ख ते भाव पक्ख दी गल्ल ऐ, इस बारे च सब थमां पैहलें कला पक्ख दे बारे च बचार करने दे बाद पता चलदा ऐ जे इस संग्रैह दियें गजलें च कवि ने किश अपवादें गी छोड़ियै बाकी सारें शेऽरें च बैहर, बजन, काफिया ते रदीफ विधान दे नियमें दा पूरी चाल्ली सावधानी कन्नै पालन कीते दा ऐ ते प्रसङ्गानुसार लोड़ा मूजव बनकदे अलंकारें दे कन्नै-कन्नै बिम्ब ते प्रतीक विधान दी बरतून कन्नै बी इ'दे च भावप्रवणतां ते उत्तम काव्यत्व आहनने दा सराहनी प्रयत्न कीते दा ऐ। जे भाव पक्ख दे बारे च गम्भीरता कन्नै गल्ल करचै तां पता चलदा ऐ जे कवि ने कुतै-कुतै वाक्या गै दिल छूहने आहले भावें दी अकासी कीती दी ऐ। काव्य शास्त्र दे मताबक उ'ऐ काव्य-रचना श्रेष्ठ होंदी ऐ, जिस च विचार (यनी बुद्धि) तत्व, भावतत्व ते कल्पना तत्व इ'नें त्रौनीं दा सन्तुलन होऐ की जे पराग होर अगैं गै इक सिद्धहस्त कवि न, इस लेई अपने इस नमीं विधा दे शेऽरें दे बारे च बी इंदा काफी जागरूक होना सभावक ऐ।

जित्थें तक इस संग्रैह दी भाशा दा प्रश्न ऐ, ओह ठेठ डोगरी होने करी मती खूबसूरत

ते प्रांजल ते है गै, पर इंदे च इ'नें कुतै-कुतै ठेठ शब्दें दा प्रयोग करिये एह आभास देने दा प्रयत्न कीते दा ऐ, जे मनो एह हून बी दिल्ली नेई बल्के अपने ग्रां पौनी च गै रौहदे न। एह कोई ममूली गल्ल नेई ऐ। इ'यै नेही मानसक जां बौद्धक अवस्था ते उससै कवि जां लेखक दी गै होई सकदी ऐ, जिसदी प्रतिभा शक्ति (vision) च अपनी जनम-भूमी ते मां-बोल्ली दी तस्वीर फिल्मा दे परदे आह्ला लेखा म्हेशां उभरदी र'वै। पर प्रूफ शोधक ने लापरवाही करिये इसदी खूबसूरती गी बगाड़ी दिते दा ऐ, जेहड़ी मती दुखै आहली गल्ल ऐ।

हून इत्थें इस संप्रैह बिच्चा किश चुनिंदा उदाहरण प्रस्तुत करिये उ'नें गी अपने मन्तव्य दी कसौटी दे परिप्रेक्ष्य च परखेआ जंदा ऐ। हेठ लैती दी पंक्तियें च कवि कला पक्ख ते भाव पक्ख दे दायरे च रेहिये समाजक यथार्थ दे इक पैहलू दी तस्वीर पेश करदा होआ आखदा ऐ-

- "में पोआहने पैर चलदा ढक्कियां ढलदा रेहा।

कड़कदी धुप्पा च में जलदा रेहा, बलदा रेहा। (सफा० 31)

अपनी उमर दे तकाजे थमां प्रेरत होए दे- कवि दे मन च अपने जीवन दे रहस्यें दे बारे च केई प्रश्न उभरदे न, पर उससी जवाब नेई मिलदा ते कन्नै-कन्नै अपने कन्नै संसारक सरबंभें कोला उकलाने ते बरागपन भाव बी उसदे मनै च बार-बार उभरदे न-

- "में कु'न आं में कैहसी आयां सोचा करनां परती-परती।

कु'न मेरा सै मैहरम इत्थें घोखा करनां परती-परती॥

कोई मेरा नेई संगी साथी, नां गै मेरा कोई हमदर्दी।

पही बी की बैठे दा इत्थें दिक्खा करनां परती-परती॥

(सफा० 35)

मजूदा दौर च साढ़े समाज च जेहड़ियां खराबियां आई गेदियां न उंदी बजह कन्नै माहनू दा मन बी बेइमान ते धोखेबाज होई ग'रा ऐ। इस लेई कोई विश्वास-जोग नेई ऐ रेहदा। हून कोई बी बुरी थमां बुरी हरकत करने थमां ओह नां संगदा ऐ, नां गै गुरेज करदा ऐ। कवि इस शेडर च इस बारे च अपने बचार अभिव्यक्त करदा ऐ-

- दूर धारा बिच कोई भाख लम्मी लारदा।

भेत गुज्जे ओह मनै दे बाहर कढदा जारदा॥

गल्ल कोई सै मनै दी कुसैंगी दस्सो नेई।

एह संसार डाहडा पानियै बिन मारदा।

कन्न कंधें गी बी होंदे गल्ल सोचियै करो।

जढ़ां कप्पियै ऐ टकाने गी बलगारदा।।

करो नेई इतबार कुसै पर, कोई अपना नेई।

हेजला बनियै सै दुद्धै बिच मौहरा पारदा।। (सफा० 37)

कवि गी अपनी मौती दा एहसास होन लगी पेदा ऐ, इस्सै करी सारे संसारी रिश्ते-नातें गी तिलांजलि दिंदा होआ आखदा ऐ जे में सारे सरबंध मकाई-समाहियै इस संसारे थमां चली जाना ऐ, इस लेई ए सज्जन-सरबंधियो एह सारी दुनियां तुसें गी गै मुबारक ऐ-

- "दुनिया एह सारी तुसेंगी मुबारिक।

एहू सभ्ब दुनियादारी तुसेंगी मुबारिक।।

× × ×

में जाना मकाइयै सै सरबंध सारे।

एहू सभ्ब देनदारी तुसें गी मुबारिक।। (सफा० 39)

अगै चलियै कवि पराग माहनू दे किरतधन सभाऽ दी नखेधी करदा होआ अपने बचार इ'यां अभिव्यक्त करदा ऐ-

- किरतधन माहनू बड़ा कीती दी नेई जानदा।

तांह लेंदा जारदा ते त्वां सै बसारदा। (प० 42)

भाएं धन-दौलत दी बजह कन्नै ते भाएं कुसै बड्डे औहदे दी बजह कन्नै माहनू च आए दे बेक्यासेपन उप्पर ते अभिमान उप्पर अपने व्यंग दी करारी चोट करदा होआ कवि आखदा ऐ-

- सीतें ठरदे धुप्पें जलदे रस्ते रेह बनांदे।

दूर खड़ोइयै दिखदे रेह ओह मनै च पीहगां पांदे।।

मछुआ रुढ़दा गोआ सामने हत्थ निं बिंद पोआया।

कन्नें दे बिच देई अंगुली रेह ओह भाखां लांदे।

अस तरेहाए रेह, पानी नेई घुट्ट पलाया।

ओह शिवें दे उप्पर लोटे भरी-भरी रेह चढ़ांदे।। (प० 46)

कवि अपनी आतमा गी नारी रूप देइयै आखदा ऐ जे उस अज्ञात शक्ति पासै लगन लगगी

जाने पर सारे सुख-दुख भुल्ली जंदे न। ओह रात भर उसदी निहालपा च जागदा ऐ जे शायद ओह आइयै कुतै उसदे घरै दी सौंगल निं खड़काई देऐ। पही ओह उसदे नांऽ रुक्के ते चिट्ठियां बी लिखदा ऐ, पर उसदा सरनामा पता नेई होने करी सब बेकार। खीर नराश होइयै ओह सोचदा ऐ, जे उन्न अपने मनै गी जेहड़ी लगन रूपी अगग लाई दी ऐ, उस्सी स्थालने दा पुआऽ बी नेई ऐ लब्धा करदा-

- “बलगी-बलगी में तुसें गी रात बताने लाई ऐ।
पर सै तुसें घरै दी मेरे सौंगल नेई खड़काई ऐ॥
रुक्के लिखी-लिखी में हारी, पर सरनामा औंदा नेई।
कि'यां स्थालां अगग मनै दी जेहड़ी सै सलगाई ऐ। (सफा० 49)

किश इ'यै नेह वियोगी अवस्था दे भाव इस शेर च बी काबले गौर न-

- “कुसै गी भेजी-भेजी उं'दी खबर नुआनां बल्लें-बल्लें।
दुद्ध पलाया में सपमें गी न्हेर-सवैरै जाई-जाई ऐ॥
कैहसी एह गलती कीती पच्छोतानां बल्लें-बल्लें (सफा० 65)

अगले शेर च कवि बिंव-योजना, प्रतीक के रूपक ते उपमा अलंकारें दे माध्यम कनै अपने मनै दी उस अनन्त शक्ति पासै लगगी दी लगन दा होर मते काव्यात्मक ढंग कनै चित्रण करदा होआ आखदा ऐ-

- “मेरा मन पैछी परदेसी उड्डदा उच्चियें धारें।
गासै दे बिच चलै विचरदा दिखदा रोआरें-पारें॥
कोई छौरा-जन सै आइयै छँहदा पैर टकांदा।
बिट-बिट, बिट-बिट दिखदा जा दा गल्लां करदा शारें।
चार-चफेरै काली चादर बिचें चमकन तारे।
आखो हट्टियां लाइयां आइयै मेलें बिच बनजारें। (सफा० 50)

कवि पराग आखदा ऐ जिसलै समाज बिच बेन्याई ते भ्रष्टाचार बगैरा बुराइयें दी बजह कनै पाप फैली जंदा ऐ तां उसलै केइयें माहनुएं दा धर्म-कर्म पाठ-पूजा, छापा-तिलक, ब्रह्म ज्ञान ते समाज पढ़नी बगैरा सब्भै पखंड ते मात्र दखावा गै बनी जंदे न। इन्नै तक जे नेह पंखडियें

दे गल पेदी तुलसी दी माला बी तलवारी दा रूप धारण करी लैंदी ऐ-

अन्दर पुल्ला पापें भरेआ, पैर हुआ दे बज्जर भारे।

बाहरा बनदे तिलकाधारी, अन्दरा बनदे ब्रह्मज्ञानी

(सफा० 76)

x x x x

ते-जदूं सै बेन्याईं मनैगी तड़फान लगदी ऐ।

तां एह तुलसी दी माला पलै बिच तलवार होई जंदी।”

पर एह शेर दो अर्थी बी सेही होंदा ऐ जिसदा दूआ अर्थ ऐ जे गलै च तुलसी दी माला धारण करने आह्ला ज्ञानी-ध्यानी बी बेन्याईं दे खलाफ विद्रोही बनियै मदान च आई जंदा ऐ। जेकर अस इस्सी दो अर्थी शेर मन्नी लैचै तां इत्थें शलेश अलंकार बनी जंदा ऐ।

इससै सन्दर्भ च कवि गी अपनी मातृभूमी डुग्गर धरती दे अतीत दा चेता करियै उसदी तुलना वर्तमान कन्नै करदे होई आखदा ऐ-

- सभनें बिच प्रेम-प्यार हा, प्यार भरोचे डुग्गर बासी

पर हून घर-घर पलदे जादे तेरे-मेरे बल्लैं-बल्लैं।।

आदर-मान बड़ा हा घर-घर बड्डें दी मनदे हे सारे।

पर हुन बिस्सरदे सब जादे लोक जठेरे बल्लैं-बल्लैं (सफा० 67)

डोगरी दे जाने माने कवि यश होरें गी जि'यां मरने थमां किश समां पैहलैं जिसलै अपनी मौती दे औने दा आभास होन लगा हा तां उ'नें आखेआ हा-

मिगी पता, उसनै औना ऐ-

पही कैहदा सैन्सा डर कैहदा।

केई बारी पैहलैं बी आई।

छुपले पैरें हौली-हौली,

आई सरैंदी बेही जंदी ही।

पर मूंहां किज नेईं बोल्ली।

हुण आई तां पके पैरें ओहदे नै चलना पौना ऐ।

इ'यां गै कवि श्यामदत्त पराग गी बी अपनी मौती दा एहसास होन लगी पेदा ऐ तां गै एह शेर लखोआ ऐ-

- मौती आहली बक्खी पैर बधा दे मेरे बल्लै-बल्लै।
 न्हरे पिछुआ जागा करदे नमें सवेरे बल्लै-बल्लै॥

इस शेऽर च सृष्टि चक्र पासै स्पष्ट इशारा ऐ। इक शेऽर च कवि पराग अपनी धरती ते उस कन्नै माहनू ते खास करियै करसान दे सरबन्ध दा जिकर करदा विस्तार कन्नै गुण-गान करदा होआ आखदा ऐ-

में धरती दा पुत्र में करसान।
 एह धरती ऐ मेरी सै पनछान॥
 सरसी-नरमी सर्दी-गरमी जरदा।
 इसगी अर्पित करनां में मन-प्राण॥
 एह धरती सभनें दा पालन करदी।
 एह साढ़ी सभनें दी जिन्द जान॥ (सफा० 78)

थल्लै उद्धृत शेऽर च कवि अपने वेदान्ती विचारे गी अभिव्यक्त करदा होआ आखदा ऐ जे परमात्मा ते सारे देवतें कन्नै माहनू दे अपने अंदर गै बास करदा ऐ। उ नेंगी पनछानने आसतै अपने मन रूपी तोते गी काबू करियै राम-नाम दा पाठ पढ़ानै पौंदा ऐ।

- अपना मन गै ठाकुर द्वारा इस्सै बिच देवते सारे।
 इस्सै दी पूजा करने गी जोत जगानी चलदे-चलदे॥
 मेरा मन तोता जन कनेहा उडदा फिरदा अगगै-पिच्छै।
 में इस्सी सै फगड़ी-फगड़ी राम रटानी चलदे-चलदे । (सफा० 84)

कवि आखदा ऐ जे अजें बी साढ़े देसै च गरीबी दी इन्तहा ऐ, जिस बिच लोकें दा शोशन लगातार केई रूपें च होआ करदा ऐ-

- कुड़ी भुक्खी दी रोई-रोई मरी जंदी।
 कोई आखदा एह नजरोई गेई ऐ॥
 तोपा दुद्धै दा दिक्खियै झोटिया हिट।
 लम्बइदारे दी नजार बदलोई गेई ऐ॥
 साढ़ी जिन्दू च रत्तू दी बिन्द दिक्खी।
 भी शाह दी अक्ख ललचोई गेई ऐ॥ (प० 116)

उप्पर दित्ते दे संक्षिप्त सर्वेक्खन कोला स्पष्ट होई जंदा ऐ जे डोगरी दे सिद्धहस्त कवि श्री श्याम दत्त पराग होर अपने गजल विधा दे खेत्तर च. पैहले प्रयास च बी काफी सफल न। भाएं कोई बी रचना खास करियै पैहली रचना अपने च भलेआं मुकम्मल नेई होंदी। उस च कमियां ते अपवाद रूप च रेही गै जंदिंयां न, पर असैं तां बी उसदा स्वागत गै करना चाहिदा। कवि कालिदास द्वारा अपने साहित्य च द'ऊं प्रसङ्गें च आक्खे दे इ'नें द'ऊं वाक्यें गी इत्थें उद्धृत करियै में अपनी कलम गी विराम देन लगां-

(1) पुराण मित्येव न साधु सर्वम्।

न चापि न व मित्यवधम्।

कोई बी परानी रचना भलेआं दोश मुक्त होने करी उत्तम नेई होंदी ते नां गै कोई नमीं रचनां किश दोशें करी निन्दनीय होंदी ऐ।

(2) एको हि दोषो गुण सन्निपाते निमज्जतीन्दोः

किरणेष्विवाङ्ग ॥

कुसै रचना च जेकर कोई इक-दो दोश होन बी तां ओह उसदे बाकी गुणें दी बजह कनै इ'यां छप्पी जंदे न जि'यां चनै दियें. किरणें च उसदा काला नशान छप्पी जंदा ऐ।

